

KALARA OSU MOSES

BA LOE NA

YENESIS

Atie lë si ai Mot

Bësal. 104:2. Min. 17:24-28

Yes. 45:7. 2 Kòr. 4:6

1 A mëtari, Zamba nga tie yob ai si. [2] Si e nga bë azam-zam-zam ai mfulëmfu; dibi a nga bë à edòa yob; Nsisim Zamba o nga bë hë o foñan à mëndim ya yob.

3 Ndò Zamba a nga dzo na: Engëngën e **4** bøk; ndò engëngën e nga bò. Zamba a nga yën na, engëngën e nga bë mbën; ndò Zamba a nga kandi engëngën ai dibi; **5** Zamba a nga yole engëngën na, Amos, ai dibi ki ndò a nga yole na, Alu. Ndò ngoge e nga bò, kidi e nga bò fë, amos osu.

6 Ndò Zamba a nga dzo na: Nyëm ò bøk à bizëzañ mëndim, o kandi fë mëndim ai **7** mëndim. Ndò Zamba a nga bò nyëm, a kandi fë mëndim më nga bë à nyëm si ai mëndim më nga bë à nyëm yob. **8** Ndò a nga bò nala. Ndò Zamba a nga yole nyëm na, Yob. Ndò ngoge e nga bò ai kidi e nga bò fë, amos baè.

9 Ndò Zamba a nga dzo na: Mëndim më nè à yob à si më kogan fufulu hom mbøk, nkodë si o yënëne fë. Ndò a nga bò nala.

10 Zamba a nga yole nkodë si na. Si, ai mëndim ya më nga man koan fufulu a yole mò na, Mañ. Ndò Zamba a nga yën **11** na a nga bë mbën. Ndò Zamba a nga dzo na: Si e faga bilòk, bile bi wumuñ mvòn, ai bile bibuma bi wumuñ bibuma ya bi nè mvòn dzaba, ele esë ayòn die à si mu. **12** Ndò a nga bò nala. Si e nga fâ bilòk, bile bi wumuñ mvòn anë mëyòn maba mëbën, bile bi wumuñ bibuma ya mëyòn maba,

ele esë anë akiaè die. Ndò Zamba a nga yën na a nga bë mbën. Ndò ngoge e nga bò **13** ai kidi e nga bò fë, amos lala. Ndò Zamba **14** a nga dzo na: Mimfie mi bøg à nyëm nè mi kandi amos ai alu; ndò fë mi bøk mëndëm ai biyòn mimbu ai mëmos ai mimbu, mi bøk fë mimfie à nyëm yob nè **15** mi vë mfie à si mu. Ndò a nga bò nala. Ndò a nga bò mimfie minnën mibaè, mfie **16** nnën o dzoege ai amos, mfie yëgan o dzoege ai alu; a nga bò fë atitie. Ndò **17** Zamba a nga tële dò à nyëm yob nè lë vë mfie à si mu, nè lë dzoe ai amos ai **18** alu, ai nè lë kandi mfie ai dibi. Ndò Zamba a nga yën na a nga bë mbën. Ndò **19** ngoge e nga bò, kidi e nga bò fë, amos nyini.

Ndò Zamba a nga dzo na: Mëndim më **20** vaa etitib bëvëvë bikokoma, anòn a yëlëgë à yob à nyëm yob. Ndò Zamba a nga tie **21** bodo bë zòa mañ ai vëvë ekokoma asë a foñan, ndzò mëndim më nga vë, anë mëyòn maba më nè, ai onòn mëfab osë anë ayòn die. Ndò Zamba a nga yën na a nga bë mbën. Ndò Zamba a nga maa bò, **22** nye na: Biean, mi foe, mi dzalëgan mëndim ya mañ, anòn a foe fë à si mu. Ndò ngoge e nga bò, kidi e nga bò fë, **23** amos tana.

Ndò Zamba a nga dzo na: Si e vaa **24** bëvëvë bikokoma anë mëyòn maba më nè: biyëm ai ba biwowònò ai ba tsidi ya si anë mëyòn maba më nè. Ndò a nga bò nala. Ndò Zamba a nga bò ba tsidi ya **25** si anë mëyòn maba më nè ai biyëm anë mëyòn maba më nè, ai ba dzomo asë a wòn à si anë ayòn die a nè. Ndò

Zamba a nga yën na a nga bë mbën.
 26 Ndò Zamba a nga dzo fë na: Mbògan
 mod à ehëgëlë dzaan, anë efulan dzaan;
 mbò bë dzoe kòs ya mañ, ai anòn ya
 nyëm yob, ai biyëm, ai si esë nyina, ai ba
 27 dzomo asë a wòn à si. Nala Zamba a nga
 tie mod à ehëgëlë dzie emën, à ehëgëlë
 Zamba ndzò a nga tie nye; a nga tie bò
 28 nnom ban ñga. Ndò Zamba a nga maa
 bò, a dzo ai bò na: Biean, mi foe, dzalëgan
 si, mi dzoe dzò; dzoegan fë kòs ya mañ,
 ai anòn ya nyëm yob ai vëvë dzom asë
 29 a foñan à si. Ndò Zamba a nga dzo na:
 Yën sik, më manëya minë vë ele esë ya
 wum mvòn, ndzò e në à si mu esë, ai ele
 esë e në mvòn ya ebuma dzie; bia yi minë
 30 bò bidi. Ndò fë abë tsid esë ya si, abë
 onòn osë ya nyëm, abë ba dzomo asë a
 wòn à si, e dzom esë e bëlë ñhëbë enyiñ,
 më manëya vë nyuman elòk anë bidi.
 31 Ndò a nga bò nala. Ndò Zamba a nga
 yën na, e dzom esë a nga man bò, yën sik,
 e nga bë eyëgan mbën. Ndò ngoge e nga
 bò, kidi e nga bò fë, amos samëna.

2 Nala yob ai si bi nga sòndò tieban,
 2 fufulu ai minkunda miaba misë. Ndò
 amos zamgbala ngò Zamba a nga sòndò
 esie dzie ya a nga bò, ndò a nga wòè amos
 zamgbala à esie dzie esë ya a nga man bò.
 3 Ndò Zamba a nga maa amos zamgbala, a
 fubu wò, asu amos te ngò Zamba a nga
 wòè à esie dzie esë ya a nga man bò à
 ntieanë biëm.

Akom lë fam ban mininga
Yën. 1:26-28. 1 Kòr. 15:45-49
Ak. 22:1,2; 2:7

4 E mana më në mëbonde më yob ai si
 abok bi nga tieban. Amos ya YEHOVA
 5 Zamba a nga bò si ai yob. hala ele ziñ ya
 fiaè ya bë ki bò à si mu, tò elòk ziñ ya
 fiaè ya bë ki fâ: – asu hala YEHOVA
 Zamba a bë ki nò mvën à si mu, ndò fë
 6 tégë ai mot ya a sie si; hë nkud o bédë à
 yob o sòg à si, ngò o haa si esë mëndim –
 7 ndò YEHOVA Zamba a nga kom mot ai
 mëtsò ya si, ndò a nga vundu ñhëbë ya
 enyiñ à mimbil ya dzoe die; ndò mod a
 nga bò vëvë ekokoma.

Afub ya Eden

Ndò YEHOVA Zamba a nga be afub à 8
 Eden, à ntole dzob; hom te ngò a nga fudi
 mot ya a nga man kom. YEHOVA 9
 Zamba a nga bò në si e fâ ele esë e në abën
 à yën ai mbën à ndian, ai ele ya enyiñ à
 tètëm afub fë, ai ele ya yëm mbën ai abe.

Osoe o nga bë o sòg à Eden o haa afub 10
 mëndim, akorogo hala ndò o nga kân fal
 enyin. Dzoe ya e nyu osu a në Pishòn; ngò 11
 wa boman ngum si ya Havila, hom te ngò
 gold a në; ndò fë gold ya si te a në mbën; 12
 bdellium ai akòg oniks bi në we. Dzoe ya 13
 osoe baè a në Gihòn; ngò o në e wu wa
 boman ngum si ya Kush. Dzoe e wu lala 14
 a në Hiddekel, ngò wa sigi à ntole dzob
 ya Asirya. Osoe nyini ngò o në Efrat.

YEHOVA Zamba a nga tòè mot a toe nye 15
 à afub ya Eden në a sie dò, a kalëga fë dò.
 Ndò YEHOVA Zamba a nga bënde mot, 16
 nye na: O dzaak ele esë ya afub; hë ele 17
 ya yëm mbën ai abe, ndzò o bë di, amu
 amos wa yi di dzò, wa yi wu vë awu.

Ndò YEHOVA Zamba a nga dzo na: 18
 Lë së ki mbën na, fam e tòbò etam, ma
 yi nye bò nka ya a yëan ai nye. Ndò 19
 YEHOVA Zamba a nga bò ai mëtsò, ba
 tsidi asë ya fiaè ai anòn asë ya nyëm, ndò
 a nga zu ai bia abë mot në a yën anë mbol
 a yole bia; ndò e dzoe asë mod a nga yole
 vëvë ekokoma asë, ndò a nga bò dzoe die.
 Mod a nga yole biyëm bisë moe, ai anòn 20
 asë ya nyëm, ai tsid esë ya fiaè; hë mfaa
 mod a ndzi ki yën nka a yëan ai nye etëre.
 Ndò YEHOVA Zamba a nga yali mod oyò 21
 mëlòm, a toa oyò nala, ndò a nga tòè
 mviaè dzie, a man fë dib hom te ai minson;
 e mviaè ya YEHOVA Zamba a nga tòè abë 22
 mot ndzò a nga bò ai dzò mininga, a sò
 ai nye abë mot. Ndò mod a nga dzo na: 23

Eyòn dzi hën, evës ya bivës biama dzi,
 ai nson ya minson miama nyu;

a yi loeban na, Mininga,

asu ya a nga nònëban abë Fam.

Asu te ndò fam ya yi lig esia ai nnyia, a kë 24
 lad ai ñga, bë ntoa nson mbòk. Bò bëbâna 25
 bë nga toa minsò, fam ban ñga, hë tégë të
 wogan osòn.

*Nkuan Mot**Mat. 4:1-11. 2 Kòr. 11:3. 1 Tim. 2:14*

3 Nyò e nga bë mèkèn e lodo ba tsidi asë
ya fiaè YEHOVA Zamba a nga bò. E nga
dzo mininga na: Yë Zamba a nga dzo
fòà na: Të mina di ele esë ya afub ngâ?
2 Ndò mininga a nga dzo nyò na: Bi në di
3 bibuma ya bile ya afub; vë ebuma ya ele
e në à tètëm afub, Zamba a nga dzo na:
Të mina di dzò, tò a namba dzò, në mi za
4 wu. Vë nyò a nga dzo ai mininga na:
5 Mina yi ki wu awu. Asu Zamba a yëm na,
amos mia yi dzò di, mis mân ma yi
kuiban, mi ntoà fë hë anë Zamba, mi
6 yëmën mbën ai abe. Mininga a nga yi
yëm na, ele e nga bë mbën à ndian, mbol
e nyëbë fë nala à mis, ai ele ya nyanda
asu ya vë mot fëk, ndò a nga fad ebuma
ya etëre, a nga di; ndò fë a nga vë nnom
ya ban nye bë nga toa, nye fë a nga di.
7 Ndò mis maba bëbâna më nga kuiban, bë
nga yëm fë na, bë nga bë minsò, ndò
bë nga man lat kie faige, bë nga bò bëbën
bibui mëndzak.
8 Mbol bë nga wok kiñ YEHOVA Zamba
abog a wulugu à afub etëre à mfëb
ngongoge, ndò fam ban ñga bë nga kë
sòbò YEHOVA Zamba à bile ya afub
9 etëre. Ndò YEHOVA Zamba a nga loe
10 mot, nye ai nye na: O në he? Ndò a nga
dzo na: Më wok kiñ dzoe à afub etëre,
ndò ma kòn wòn asu ya më në nsò, ndò
11 më sòlò. Nye ai nye na: Za a karë wò na,
o në nsò, yë o diya ebuma ele ya më nga
12 kili wò na, të wa di? Mot na: E mininga
ya o nga vë na bi nye bi tòbò, nnye a hë
vë ma ebuma ele, ndò maa më di.
13 Ndò YEHOVA Zamba a nga dzo ai
mininga na: Za dzama o hë bò di?
Mininga na: Nyò ndzò e duk ma, ndò më
14 di. Ndò YEHOVA Zamba a nga dzo ai
nyò na:

Asu ya o bò e dzam di,
o në biyòè alodo biëm bisë,
alodo fë ba tsidi asë ya fiaè;
wa yi wulu ai abum,
o dzaa fë mëtsò mèlu mësë ya enyiñ
dzoe.

Ma yi bò ziñ à zañ dzoe ai mininga, 15
ai à zañ mvòn dzoe ai mvòn mininga,
ndzò ya yi wò tsaa nlo,
vë wò wa yi dzò tsaa etinda.

Abë mininga, nye na: 16

Ma yi bulu nënë mintie mie ai mënnòn
bum moe,
wa yi bie bòn ai mintie;
miñyan mie mia yi bò abë nyò nnom,
nnye fë a yi wò dzoe.

Abë fam, nye na: 17

Asu ya o nga wok kiñ nyò ñga,
o nga di ebuma ele ya më nga kili wò na:
Wa yi dzò bò të di,
si e bøk biyòè amu wò;
wa yi di biëm ya etëre ai ndzuk mèlu
mësë ya enyiñ dzoe;
dza yi wò fâ biyò ai ndoe; 18
wa yi fë di bilòk ya fiaè.

Wa yi di mbanëla à eduduk ya asu doe 19
akui anë wa yi dungan à mëtsò,
asu ya o nga nònëban abë mò;
o në mëtsò,
wa yi fë dungan à mëtsò.

Ndò mod a nga yole mininga dzoe na, 20
Efa, asu nnyë a nga bò nnyia ya bëvëvë
bësë. Ndò YEHOVA Zamba a nga bò 21
Adam ban ñga mimbòt bikob, a bòdò bò
mia.

Ndò YEHOVA Zamba a nga dzo na: 22
Yën sik, mod a ntoya anë mbòà ya abë
bia, à nyëman mbën ai abe; në a za barë
sam wò woe a nònò ele ya enyiñ, a dî, a
nga niñ fë kòm – asu te YEHOVA Zamba 23
a nga tsidanë nye à afub ya Edën, na a kë
sie si ya a nga nònëban etëre. Amana a nga 24
man tsidan mot, ndò a nga tële békërubim
à ntole dzob ya afub Edën, ai mkpadi
mëkon wa kilan mimfaa misë, në bi kala
zën ya ele ya enyiñ.

MFUFUB BIBEL

NNOM ELAT AI MKPAMAN ELAT

Société Biblique

Cameroun-Gabon

La Sainte Bible en langue Beti

The Bible in Beti

UBS-EPF 1987-1M-63P